

The Makuilongdi Express

Liangmai Daily Newspaper

“Mazibo niu ngamne”



Takum 37 mibo Cristiano Ronaldo hai makum Chabamhiu padsai paniu nahdou mathen khangbo club Sporting Lisbon lam wangbo suiye chiujiu dinne. Thaikum tinlum ting (summer) gadi Manchester United gasu tad mira kamjiu tadlu makjiu tami bowe.



Takum 22 mibo Tangkhul mainah Thanpam Kasomhung, Manipur gasu Indian Institute of Management, Ranchi (IIM-R) Singapore based company ga changam kambo gasu takum ga 67 lakh dou luwe chiujiu dinne.

Zengtung 1 Matuingeehiu 2022 Machanai Chiang PO Tamei ,Tamenglong Dist. Manipur Vol.01. Issue 23 Page 1

Rangkang tusuang aladdin tu kada lulo. Withubo kachia tu suang tasi haitu kada lulo. Kadincham 8:10.

STDCM tu ATSUM niu suinimakbo hai pathou cha makge.



IFP Bureau

Chag.31: Schedule Tribe Demand Committee Manipur (STDCM) niu Meitei or Meetei tu schedule tribe gu status ga paliu tudi zoukhai ra government khuga khengbambo haitu All Tribal Students' Union of Manipur (ATSUM) niu suini makjiu atung bambo hai tu STDCM niu tadjju lukhai lakbo cham dinjiu bam mide. Paliu niu dinjiu ATSUM dung paliugu chapkhai hai kali milo palamra Meitei/Meetei niu schedule tribe gu status gu zouboni community khat tudi kam masa khaibo bam lakge chiujiu dinne. Tadmibo zengtung 30th Chagaahiu nai STDCM niu Health & IPR Minister Dr, Sapam Ranjan khuga meitei/Meetei tudi ST ga khaimak suilakge chiujiu memorandum pikhai mide chiujiu dinne. STDCM gu convenor Laisram Romesh niu dinjiu ATSUM niu Meitei/Meetei hai disu mibo khatdi kudiangbo satga bammi bowe chiubo si lu kasuibo lad makge. Tuhoi Imphal valley hai 1,843 square kilometers ronna bo kadih hai constitutional rights ga kadih tu kan suibo wadi haye, Asian Highway nai Railway project hai tadkiu

Chagaa ngee pabam pakhai tamtambo ga aliu Liangmai dung changee khai mide.



TME Tamei



Chag. 30: Aliu Liangmai gu changee thiujju maijad mainiu di pariak chak khaijiu maksai palun sikhaijiu bamra chiujiu Liangmai gu changee waji bamdi panai zanleng thiujju “Chagaa Ngee” tu thin lujiu state level gu thiujju thainai mien niu Luan 9th gu thiujju aliu Liangmai lung aruang lujiu phakpadbo nam Makuilongdi ga State Level Chagaa Ngee hai Chagaahiu zengtung 30th 2022 nai tadkiu khai mide. Haibo changee ga Liangmai nam pake madai lamsu chamai wajiukha wangjiu padam lukhai mide.

Nchang maji makbo politician dungniu chingen khatdi ajeng khaitam padjiu bambo we. CM N Biren



TME Tamei

Chag. 30: Chief Minister N Biren Singh niu tad mibo Nidnai Luan 9thbo Chagaa ngee, Makuilongdi nam, Senapati district ga tacham dinjiu tuhoi Manipur pang paroisoi jiu bambo hai nchang maji makjiu

Organising committee mainiu malum khaibo nai nchamjiu nam-nam maidi wangjiu padam lukhaibo ronna makjiu, chalen, chalui, tathon chariu thiubo thak khatdi npeng kepbo ngamdi mathiu suang ga kamlen khai mide. Makuilongdi Chagaabo hai Manipur ga bambo mathiu gu thiujju aruang lujiu marangbo we. Haiga Chagiangpi hai Munhu N Biren Singh Hon'ble Chief Minister, Manipur niu thiukhai ye, Mangum Phungpou hai Munhu Awangbow Newmai Hon'ble Minister, Water Resources, ... cond.t.in p2.

politic kambo gasu chingen nai ajeng khaitam ra kamjiu bambo we chiudi tuhoi thinjiu bambo government niu sikumbo kam mahajiu kasonbo maksai kasiambo zat dung tudi pijiu kam madi ..cond.t.in p2

Tuwoinah/Takouleng (Amur Falcon) tu Manipur kamsat bamdi maidi phuikhai makge.



South Eastern Siberian lamsu pawan wanga padung thiujju lenwang wangjiu bambo Tawoinah/takouleng (Amur Falcon/ Falco amurensis) haisi Manipur, Nagaland, Meghalaya khatdi Assam chiujiu len towoing lujiu Tamenglong district ga Chagaahiu kahou lamsu takum machang len wang-wang jiu bam tuhai manam karon mainiu airgun/ chaganmi/ chapi niu nai machang wajiu kepsatjiu bamme chiudi maidi khamkhaira maksai manangkhai mai haye chiujiu dinne. Tad mibo 2020 gara chakhou puina khatdi thingnang dungtu kamsat makra chiujiu airgun di kha kadui jiu khatdi keptad maitu minjiu wajiu manang khaijiu bamniu we chiudi thaikum thiujju ra wadi haikumbo kakhambo haji tu tadkiu bam bohai maidi phui manang khaira ye chiujiu tacham ga dinne.

Karingting Lunlung



Thaikum ra nde kam jiu simak geda, tuwoinah/ takouleng theng masuang kumjiu wang makeng mak kumda, chia?
@@@Airgun niu de, chiubi bi mede.

Tacham pikhai nibo khatdi alam khaini sai 9366176046 alam khailo.

Naka tu mahinjiu dinkhai bilo, rukhai bilo, chiudi maisuang ga madujiu thonkhai bilo.

Editorial

Tuhoi aliu disu mibo kenga tacham chalad (Media) hai tam-tambo jai gasu tacham khatniu khatleng kalenjiu bamme. Maisang maida ga padjiu bambo hai minute khat kak gasu aliu singambo lunlung ga lungjiu bam mide. Chiudi chalad chalui hai patun pakhai thinpiu simak sai sinu di societies ga kasabo waji khadi phungwangbo bamme. Coputer kenne maksai media hai disu mibo nkenne chiudi khatniu khattu kam masa rabo maksai maigu maran phejiu kambo hai tuhoi kenga padjiu bambo mathiu siye. Chiudi kasabo kamoubo jaiga tadmakjiu kawibo jaiga mathiuleng geng suibo jaiga aliu thinpiu khai jiu tadra thou we. Nacham nalad kengniu mai khangkhat tu kam masa ngamme khatdi kam mawi khai ngamme. sinu wahina kawi boleng thinpiu khaira karam khe.

STDCM tu ATSUM niu suinimakbo....

condt.from p1

mawiji tadkiu misai pabam katam lamsu wangjiu kadih hai zinmira ye chiujiu panu din mide. Minister Ranjan niu STDCM gu demand hai lukhai suibo we sijengniu haisi pakang mai cabinet members, MLA khatdi chiefb minister khuga phungpad lujiu madin thiukhai raye chiubo cham hai poupad khai mide.

Luan 9th State Level Chagaa Ngee lengjeng gasu Chagaa Ngee debo ngeelo chiubo video compitition result.

1st- Contestant no- 12, Douraibou Chawang Rs. 2200
2nd- Contestant no.-7 Ch. Wiwangliu Rs. 1300
3rd- Contestant no-6 Khiuchamliu Wisuanamai Rs. 800

Viewers kengthubo, Contestant no.-5, Wisulungliu Rs. 700
Haibo number 8974423131 ga alam lujiu rangkang khoi lulo.

Luan 9th State Level Chagaa Ngee Committee.

Peng phenbo gu Madan

By Ab. Dijinbou Research Scholar (Ph.D), NEHU danai gu padon....

Pengphenra leng kadenbo: Pengphenra leng kaden bohahi Chagaa paniabo tingmik nai nson Kalu tadjii kadenne. Katingmai jaojiu singku niu nson kalu mengjiu karengtu ga npeng (chamaimeng npui-npiu lun ruilujii) som khai mira bowe. Sibonpeng situ maipiumai ganrijiu bammai dungniu mengjiu phenra bowe. Npeng haisi pakhak mangiu thiujii madam pat khaijiu kam me; Chariibai, tathiubai, aliubai, chamiwbai, khatdi majiwbai. Adingtang pacheng gasu machadlujiu pamun leng thui lujiu macha ye. Adingtang haisi palun kawibo khatdi kamating bositu kadaye. Npiumai dungniu makiak-marahjiu paliuniu kamachunbo bamga phentao raleng majon sonna lujiu phenbo ye.

Npeng kabambo madan: Npengga kabambo pakhak si chamai pum nai ncham jiu madan khaiye. Papi situ chariibai tiwjiu kuwe. Pawangriang situ tathiubai, pagaa situ aliwbai, pabumsitu chamiwbai khatdi pakhen hanglam situ majiwbai tiujiu ku ye. Haibo 'bai' dunggu madan di tamtamjiu bam me. Katingmai dungniu haitiujii malum bam niuwe, papi taosai chariigine, pawangriang taosai tathiu phenne, pagaa taosai aliugaine, pawan taosai chamiw kengne khatdi pakhen hanglam taosai majiw rah marajiu pasan sane. Haitiwjiu malumjiu, kasa daomak ra ganri mawi lujiu phengbo we. Kaphen maihina niu pachun ningga phentao ra karamjiu kam bam niu we. padon thiujii next issue gasu padlanne.

Nchang maji makbo politician dungniu

condt. from p1

sanjiu khatdi disu thengsubo ga school gu syllabus ga khai lujiu taliu khaijiu bambo we. Chingen ariak nahmai dungtusikhai niye nai ajeng kakga pakak pijiu thi chiujiu dinne. Tuhoi Makhel makjiu khatniu khattu alamjiu namga crore 6 gu Heritage Park kawi thiujii Manipur hai hai Sangai Festival suangga bimi tadmibo chaken waji suangga raye. Tadmibo wanga Liangmai nde chiujiu zat tam-tambo dung zat tu waji akhi khai makge lung aruang jiu khatniu khattu chiudi Liangchi namga Sub-chakhuang thiujii lungbamniulo Deputy Collector's Office taliu chiubo aliu makum ra pageng khaira maning bamme chiulu bamme chiujiu panu pasai Sub-Divisional Office dinne. Panu dinjiu tam-tambo donsusu miraye chiujiu panu zatgu characham dungdi dinsan khai mide.



The 20th Hill Badminton Championship 2022, Senapati ga mathen boga aliu Liangmai nahdi medal douluwe. Paliu zan khatdi detail pahang ga pikhai ye.

1. Mn. Pouchundibou Newmai s/o Mn. Rangambou Newmai Tamenglong Wd. 2. niu men's single ga silver medal dou luwe.

2. Rl. Jubilee Daimai d/o Mn. Guiningbou Daimai, Tharon village niu women's single ga Gold Medal dou luwe.

3. Rl. Veronica Newmai of Konphung village niu women double under 19 ga Gold Medal dou luwe.

Paliutu Liangmai Badminton Association lamsu thonkiubo cham khatdi pasai di aliu zat zan kam madi sanjiu bamra kanui khaibo cham poupad khaiye.

Chagaa ngee pabam pakhai tamtambo ga aliu....

condt. from p1

Relief & Disaster Management, Manipur niu thiukhaiye, Khatdi Chakhuang Giang hai, Munhu Maharaja Sanajaoba Leisemba, Hon'ble MP, Rajya Sabha, Munhu Dinganglung Gangmei, IAS Retd. Hon'ble Chairman Hill Areas Committee, Manipur, Munhu Janghemlung Panmei Hon'ble MLA 53-Tml. Manipur kahtdi Munhu N Kayisii Hon'ble MLA 49-Tadubi, Manipur paliuniu thiukhai mide. Shillong gadi luan 10thbo gu thiujii Chagaa Ngee hai Don Bosco Youth Centre Hall Shillong ga manid khai mide chiujiu dinne. Chagiangpi hai Albert Njuta, Social Activist niu thiukhai ye. Mn. Thonluibou Chawang, Chairman Shillong Chagaa Committee niu mathiu tu judou khaibo cham dinkhai ye khatdi Chagaa thoidam hai Mn. Huthonbou Newmai niu khengkhai ye chiujiu dinne. Mn. Ab Dijinbou niu wangmai mathiu leng Chagaabo paramba hai dinkhai ye.

Wangmai mathiu chalui thiubo chalen lenbo maksai tam-tambo mathendi tadkiu khaiye siga Liangtong gu tathon hai Mn. Chahotsuangbou Pamai niu douluwe chiujiu dinne.

Chagaahiu zengtung 30th nai pabam pakhai tam-tambo ga, Delhi gadi, Mumbai gadi khatdi Tamei HQ gadi chiujiu Liangmai Chagaa khai mibo cham kengjiu dinne.



FIFA U-17 Women's World Cup 2022 gu final DY Patil stadium Mumbai ga Colombia nai Spain mathen ga Spain niu goal khat gasu ngamjiu champion lu mide. Minute 82nd wan ga Colombia gu defender Ana Maria Guzman Zapata niu parona paki lam kamkhai bowe. Tad mibo 2018 gadi Spain niu champion lujiu bambo we.